

四庫全書

史部

欽定四庫全書

史部

河源紀畧卷

三十一

詳校官監察御史臣王爾烈

刑部郎中臣許兆椿覆勘

纂修官工部主事臣王念孫

謄錄監生臣趙錫寶

欽定四庫全書

河源紀畧卷三十

紀事五

哈密

謹按哈密漢伊吾廬地唐置西伊州後改伊州  
天寶初又改伊吾郡五代時號胡盧磧明設哈  
密衛今其地距京師七千一百八十里哈密境  
內諸水凡數十皆西南趨遇沙而伏在羅布淖

爾東北九百六十里哈密為羅布淖爾東北伏  
流來會之水所經之地謹紀其事如左

康熙三十五年九月哈密回酋額貝都勒遣貢駝  
馬及刀三十六年額貝都勒遣其子郭帕伯克擒  
噶勒丹子色布騰巴勒珠爾及其官屬來獻

詔嘉之賜賚加等授額貝都勒為扎薩克一等部長其所  
屬編為旗分視各蒙古子郭帕伯克及孫額敏嗣  
五十四年三月厄魯特策妄阿喇布坦遣兵至其

北境侵掠五寨直抵哈密城下駐防哈密遊擊潘至善等率兵二百人同哈密伯克額敏敗之賊退駐城南二十里外甘肅提督師懿德令總兵路振聲率師兼程往援哈密人衆聞

天兵適至老幼懽懽勇氣益倍策妄阿喇布坦聞風震懾於師至數日前悉衆潛遁是年七月大臣等議以哈密地可屯種請勘明具奏

詔從之雍正五年封額敏為鎮國公七年晉封為固山貝

子十年正月準噶爾賊人復來犯哈密周城四五里貝子額敏選回兵設伏擒賊將軍岳鍾琪令曹勳等率師應援遇賊兵大隊於二堡奮勇進擊合戰一日夜賊登山拒戰我兵四面仰攻賊衆大潰遂由沙磧遁而西乾隆二十一年陝甘總督黃廷桂奏以哈密在安西已里坤之中軍行臺站轉輸諸務請設大員經理

命以寧夏總兵李天指駐防之二十四年準噶爾平定

設辦事大臣二員哈密協副將一員轄駐防綠旗  
兵八百名置塔爾納沁屯田七千三十畝屯兵一  
百七十名蔡巴什湖屯田四千六十五畝屯兵一  
百名牛毛湖屯田二百畝屯兵十名管屯武職即  
於協標下派撥無定額

元和志禹貢九州之外古戎地稱昆吾周穆王伐  
昆戎昆吾獻赤刀後轉為伊吾周衰為匈奴所得  
後漢書竇固傳永平十六年竇固耿忠率酒泉敦

煌張掖甲卒及盧水羌萬二千騎出酒泉塞至天山擊呼衍王斬首千餘級追至蒲類海留吏士屯伊吾盧城

又西域傳永平十六年明帝命將帥北征匈奴取伊吾盧地置宜禾都尉以屯田遂通西域章帝建初二年罷屯田伊吾匈奴因遣兵守伊吾地和帝永元元年大將軍竇憲大破匈奴二年憲因遣副校尉閭槃將二千餘騎掩擊伊吾破之安帝元初



六年遣行長史索班千餘人屯伊吾於是車師前  
王及鄯善王來降數月為北匈奴攻沒順帝永建  
六年以伊吾舊膏腴之地傍近西域匈奴資之以  
為鈔暴復令開設屯田如永元時事置伊吾司馬  
一人桓帝元嘉元年呼衍王將三千餘騎寇伊吾  
伊吾司馬毛愷遣吏兵五百人於蒲類海東與呼  
衍王戰悉為所沒呼衍王遂攻伊吾屯城夏遣敦  
煌太守司馬達將敦煌酒泉張掖屬國吏士四千

餘人救之出塞至蒲類海呼衍王聞而引去

魏書帝紀高宗太安二年平西將軍漁陽公尉眷  
北擊伊吾克其城大獲而還高祖太和十二年蠕  
蠕伊吾戍主高羔子率衆三千以城內附

又高昌傳太和二十一年高昌王馬儒表求內徙  
高祖納之遣韓安保赴之割伊吾五百里以儒居  
之儒遣使迎安保安保不至還伊吾

隋書帝紀大業五年伊吾遣使來朝

又薛世雄傳世雄為玉門道行軍大將與突厥啟  
民可汗連兵擊伊吾師次玉門啟民可汗背約兵  
不至世雄孤軍度磧伊吾初謂隋軍不能至皆不  
設備及聞世雄兵度磧大懼請降詣軍門上牛酒  
世雄遂於漢舊伊吾城東築城號新伊吾留銀青  
光祿大夫王威以甲卒千餘人戍之而還

唐書地理志伊州伊吾郡本西伊州貞觀六年更名  
伊吾貞觀四年置並置柔遠神功元年省入焉在

大磧外南去玉門關八百里

又吐蕃傳太宗破高昌開四鎮伊吾屯田永菽彌望

資治通鑑唐太宗貞觀四年西突厥種落散在伊吾伊吾城主入朝舉其屬七城來降因以其地置西伊州十三年高昌與西突厥共擊伊吾乃發兵擊滅高昌開元中置天山軍於西州城內兵五千人擊伊吾軍於伊州西北三百里甘露川兵三千

人並屬北庭節度使

五代史高居誨記沙州西曰仲雲其牙帳居胡盧磧云仲雲者小月支之遺種也胡盧磧漢明帝時征匈奴屯田於吾盧蓋其地也西行入仲雲界至大屯城

宋史高昌傳王延德使高昌厯伊州州將陳氏其先自唐開元二年領州凡數十世唐時詔勅尚在次厯益都次厯納職城在大患鬼魅磧之東南望

玉門關甚近地無水草載糧以行

按此宋雍熙初王延德使高昌還時所記自唐開元至宋雍熙應屬十數世宋史作數十世蓋誤

明史西域傳哈密東去嘉峪關一千二百里漢伊吾盧地明帝置宜禾都尉領屯田唐為伊州宋入于回紇元末以威武王納忽里鎮之尋改為肅王卒弟昂克特穆爾嗣洪武中太祖既定輝和爾置

安定等衛漸逼哈密昂克特穆爾遣使朝貢永樂  
三年封忠順王四年立哈密衛八年封托里特穆  
爾忠義王宣德元年命布達錫里嗣忠順王自是  
二王並貢成祖之封忠順王以哈密為西域要道  
欲其迎護朝使統領諸番為西陲屏蔽而其王率  
庸懦衆心離渙其貢使又數辱驛吏卒呵叱通事  
當四方貢使大宴日惡言詬詈天子不加罪但令  
慎擇使臣以是益無忌其地北衛拉特西土爾番

東沙州罕東赤金諸衛衛拉特酋額森兵圍哈密  
取王母北還天順四年王卒母弩溫答失里主國  
事七年北酋寄寄肅蘭破其城王母走苦峪朝廷  
不能援成化二年擢已圖穆爾為右都督攝國事  
八年子哈森嗣職土爾番襲破其城執王母奪金  
印據守其地使李文討之無功十年命罕慎權主  
國事桀苦峪城移哈密衛於其地十八年罕慎襲破  
哈密連復八城還居故土弘治元年封為忠順王



土爾番阿哈麻誘殺之據其地二年都指揮阿穆  
呼朗襲破之五年立善巴為忠順王六年阿哈麻  
襲哈密執善巴擒阿穆呼朗支解之七年廷臣請  
令都督昂克波賴總理哈密且修苦峪城凡番人  
散處甘涼者令悉還其地八年尚書馬文升銳意  
興復甘肅巡撫許進等潛師夜襲之斬其遺卒  
撫降餘衆而還諸番始知畏然哈密屢破遺民  
入居者以窮窘難守盡焚室廬走甘州詔盡赳苦

峪及瓜沙州俾自耕牧以圖興復十年阿哈麻送  
還善已十年仍其舊封自是哈密復安十六年封善  
已子已雅濟為忠順王正德八年叛入土爾番十  
二年莽肅爾移居之後復入貢而王迄不還自是

置哈密不問

昂克特穆爾舊作安克帖木兒輝和  
爾舊作畏兀兒托里特穆爾舊作免

力帖木兒布達錫里舊作卜答失里衛拉特舊作  
兀剌額森舊作也先寄寄肅蘭舊作乚加思蘭巴

圖穆爾舊作把塔木兒哈森舊作罕慎阿哈麻舊  
作阿黑麻阿穆呼朗舊作阿木郎善已舊作陝巴昂克

波賴舊作奄克字刺已雅濟舊作拜牙即莽肅爾  
舊作滿肅兒和卓塔濟丁舊作火者他只丁今譯改

噶順沙磧

謹按噶順沙磧即古流沙東接白龍堆沙多土少  
東西數百里渺無垠涯在羅布淖爾正東郭義  
恭廣志流沙在玉門關外南北二十里東西  
數百里方向適合山南諸水俱滲入沙磧中噶  
順沙磧為羅布淖爾正東伏水之地謹紀其事  
如左

雍正七年大兵征準噶爾西路軍行所過沙磧從

無水草之區靈泉暢湧士馬安寧將軍岳鍾琪以

聞

詔於其地建廟展祀以答神貺乾隆二十二年西師出嘉  
峪關道經戈壁中地湧甘泉數十處軍行普濟

勅建龍神廟

封助順昭靈龍神遣官告祭每歲春秋致祀

勅建助順昭靈龍神廟碑文

國家德被遐方威宣絕漠不惟師武臣力亦實有神靈

之助用能厚集士衆克成大勛惟嘉峪關本酒泉故郡  
素稱天險關門外為戈壁地沙磧彌望澶漫逶迤向因  
難於水泉行旅重困朕蕩平西域誅其一二苞蘖之不  
順命者爰整六師深入其阻初慮士馬萬衆綆汲或缺  
於供及行其地而甘泉隨地湧出滃滃然汨汨然渟泓  
滲漉不特荷爰之士漱濯清流而馬駝絡繹赴飲不匱  
按酒泉城下舊有金泉泉味如酒漢氏遂以名郡茲泉  
出自沙漠瑞應尤異守土之吏以告朕惟祭法德施於

民則祀之當疆事方殷而泉流肆溢天人相應靈貺聿  
臻其事非偶爰封神為助順昭靈龍神命守臣經營高  
敞建立神廟春秋祀事惟謹繡棟雲楣崇巖巨鎮屹峙  
闕外廟既成當建碑記述神之功烈守臣鍤石以請稽  
諸古人君為政太平則醴泉湧朕嗣守鴻業圖大思艱  
命將出師龔行

天討掃百年逋誅之寇用以續承

先緒式廓丕基計自今邊圉靜謐屯牧安恬其所以荷

天庥而迓神祐者萬萬禩靡有紀極爰系以銘銘曰嘉峪  
之山巖闢峩峩六師于征後舞前歌宛宛流沙迢迢遠  
道天戈所臨地不受寶連巖滋液並醴疏甘光澄水鏡  
潔比秋潭汲之日新挹之無竭士飽馬騰霜清月澈迺  
營高敞迺建薨標春秋載薦丹荔黃蕉斟酌靈泉惟神  
之庇洗兵萬載錫我繁祉

勅建助順昭靈龍神廟歲祭文

惟神德溥澤民恩施育物拱巖闕而作鎮氣感風雲臨

瀚海以垂波功先潤澤惟酒泉之故地實戈壁之荒陲  
沙磧彌途向乏靈源之湧輪蹄遄邁載深渴飲之思朕  
命將于征指平沙而迅發全師所過恰膏液之滂滋萬  
馬騰驤快適奔泉之性千軍挹注咸歌洄酌之甘儼賚  
賜之壺漿飲和食德等驅馳于衽席養欲給求凡茲行  
李之往來普頌淵澄之功烈仰承

天祐敬迓神庥申命守臣經營敞地闕宮大啟雕几恪陳  
繡拱差莪薈蔚川原之氣采掾嶺嶺續紛藻苻之華爰



于靈廟之落成更遣專官而將事雲旂羽罕覘秘殿之  
森藪挂酒椒漿共明流而激灑嗣此涵濡庶彙覩清泚  
之常流衍護深源永濬發而不竭尚祈昭格鑒此精禋  
漢書地理志敦煌郡正西關外有白龍堆沙

又西域傳樓蘭最近漢東垂當白龍堆乏水草元  
始中車師後王國有新道出五船北通玉門關往  
來差近戊己校尉徐普欲開以省道里半避白龍  
堆之阨

又李廣利傳詔曰貳師將軍伐勝大宛涉流沙通  
西海

晉書苻堅載記太元八年堅授呂光持節都督西  
討諸軍事光進及流沙三百餘里焉耆王率其旁  
國請降

魏書西域傳太延中遣行人王恩生許綱等西使  
生等出流沙為蠕蠕所執竟不果達其後每遣使  
西域常詔河西王沮渠牧犍令護送至姑臧牧

健恒發使導路出流沙

魏畧西戎傳從玉門關西出發都護井回三隴沙  
北頭經居盧倉從沙西井轉西北過龍堆

哈喇淖爾境

謹按哈喇淖爾三源蘇賴河昌馬河黨河河所  
流境一千二百里蘇賴昌馬下流即古南藉端  
水蘇賴河旁支瀦為花海子昌馬河所會之窟  
窿河即明史之布隆吉爾川黨河即氏置水甘

肅通志沙州西都鄉河亦即此渥洼水亦在其  
旁其源處有龍勒水淖爾西距羅布淖爾八百  
里哈喇淖爾為羅布淖爾東偏滙水之地謹紀  
其事如左

康熙五十四年以布隆吉爾地可屯種

命勘明具奏五十五年六月尚書富寧安疏言布隆吉爾  
所種田禾俱可豐收請建倉存貯

詔從之六十一年復議設屯田兵數雍正元年

命撫遠大將軍年羹堯征羅卜藏丹津分兵進剿冬十二  
月賊兵三千餘人來侵布隆吉爾叅將孫繼宗遊  
擊孫超節率兵迎戰兵既交副將潘至善以兵至  
併力擊賊大破之二年三月總兵孫繼善等追賊  
至哈喇淖爾進擊之大敗賊衆九月副都統達鼐  
阿爾什等窮追羅卜藏丹津直抵花海子生擒丹  
津琿台吉並招撫三十三家台吉而還乾隆二十  
四年西域平設布隆吉爾營都司一員駐防綠旗

馬步兵四百九十二名

漢書武帝紀元鼎四年秋馬生渥洼中作天馬之歌注李斐曰南陽新野有暴利長當武帝時遭刑屯田敦煌界數于此水旁見羣野馬中有奇異者與凡馬來飲此水利長先作土人持勒鞞于水旁後馬玩習久之代土人持勒鞞收得其馬獻之又李陵傳陵兵出至浚稽山南龍勒水上徘徊觀冠

五代史高居誨使于闐記瓜州南十里鳴沙山西  
都鄉河曰陽關

明史西域傳成化九年都督哈森及齊勒罕東諸  
部集兵進討土魯番兵至布隆吉爾川

色爾騰海以東境

謹按色爾騰海為漢樓蘭地東漢為鄯善唐名  
納縛波宋名納職在羅布淖爾東南漢書西域  
傳樓蘭國最在漢東垂近漢當白龍堆隋書鄯

善郡有蒲昌海隋并吐谷渾地以置郡且末以東皆為隋有蒲昌海當鄯善之西境為且末國地其實鄯善故地尚在其東色爾騰水皆出南山陰西北流瀦為大澤周圍三百里去羅布淖爾九百里色爾騰海為羅布淖爾東南伏水之地今紀其事如左

漢書西域傳鄯善國本名樓蘭王治杆泥城去陽關千六百里去長安六千一百里戶一千五百七



十口萬四千一百勝兵二千九百十二人輔國侯  
卻國侯鄯善都尉擊車師都尉左右沮渠擊車師  
君各一人譯長二人西北去都護治所千七百八  
十五里至山國千三百六十里西北至車師千八  
百九十里初武帝感張騫之言甘心欲通大宛諸  
國使者相望於道一歲中多至十餘輩樓蘭姑師  
當道苦之攻劫漢使王恢等又數為匈奴耳目令  
其兵遮漢使漢使多言其國有城邑兵弱易擊於

是武帝遣從票侯趙破奴將屬國騎及郡兵數萬  
擊姑師王恢數為樓蘭所苦上令恢佐破奴將兵  
破奴與輕騎七百人先至虜樓蘭王遂破姑師因  
暴兵威以動烏孫大宛之屬還封破奴為浞野侯  
恢為浩侯於是漢列亭障至玉門矣樓蘭既降服  
貢獻匈奴聞發兵擊之於是樓蘭遣一子質匈奴  
一子質漢後貳師軍擊大宛匈奴欲遮之貳師兵  
盛不敢當即遣騎因樓蘭候漢使後過者欲絕勿

通時漢軍正任文將兵屯王門關為貳師後距捕  
得生口知狀以聞上詔文便道引兵捕樓蘭王將  
詣闕簿責王對曰小國在大國間不兩屬無以自  
安願徙國入居漢地上直其言遣歸國亦因使候  
伺匈奴匈奴自是不甚親信樓蘭征和元年樓蘭  
王死國人來請質子在漢者不遣樓蘭更立王漢  
復責其質子亦遣一子質匈奴後王又死匈奴先  
聞之遣質子歸得立為王漢使詔新主令入朝天

子將加厚賞樓蘭王後妻故繼母也謂王曰先  
王遣兩子質漢皆不還奈何欲往朝乎王用其計  
謝使曰新立國未定願待後年入見天子然樓蘭  
國最在東垂近漢當白龍堆乏水草常主發導負  
水僭糧送迎漢使又數為吏卒所寇懲艾不便與  
漢通後復為匈奴反間數遮殺漢使其弟尉屠耆  
降漢具言狀元鳳四年大將軍霍光白遣平樂監  
傅介子往刺其王介子輕將勇敢士齎金幣揚言

以賜外國為名既至樓蘭詐其王欲賜之王喜與  
介子飲醉將其王屏語壯士二人從後刺殺之貴  
人左右皆散走介子告諭以王負漢罪天子遣我  
誅王當更立王弟尉屠耆在漢者漢兵方至毋敢  
動自令滅國矣介子遂斬王嘗歸首馳傳詣闕縣  
北闕下封介子為義陽侯乃立尉屠耆為王更名  
其國為鄯善為刻印章賜以宮女為夫人備車騎  
輜重丞相將軍率百官送至橫門外祖而遣之王

自請天子曰身在漢久今歸單弱而前王有子在  
恐為所殺國中有伊循城其地肥美願漢遣一將  
屯田積穀令臣得依其威重于是漢遣司馬一人  
吏士四十人田伊循鎮撫之其後更置都尉伊循  
官置始此矣

後漢書西域傳建武十四年莎車王與鄯善王并  
遣使詣闕貢獻西域始通二十一年冬車師前王  
鄯善王等十八國俱遣子入侍獻其珍寶二十二

年莎車國王賢遺鄯善王安書令絕通漢道安不  
納而殺其使賢大怒發兵攻鄯善安迎戰兵敗亡  
入山中賢殺畧千餘人而去鄯善諸國侍子久留  
敦煌愁思皆亡歸鄯善王上書願復遣子入侍更  
請都護都護不出誠迫於匈奴天子報曰今使者  
大兵未能即出如諸國力不從心東西南北俱在  
也于是鄯善復附匈奴

又班超傳永平十六年竇固出擊匈奴以超使西

域超到鄯善鄯善王廣奉超禮敬甚備後忽更疎懈超謂其官屬曰寧覺廣禮意薄乎此必有北使來狐疑未知所從故也明者睹未萌况已著耶乃會其吏士三十六人夜往奔其營會天大風超令十人持鼓藏其舍後約曰見火然皆當鳴鼓大呼餘人悉持弓弩夾門而伏超順風縱火前後鼓噪衆驚亂超手格殺三人更兵斬其使及從士三十餘級餘衆百許人悉燒死于是召鄯善王廣以首



示之一國震怖曉告撫慰遂納子為質

又班勇傳元初六年鄯善王降後數月北單于與  
車師後部叛鄯善王急求救敦煌太守曹宗請出  
兵五千人擊之因復取西域班勇議遣西域長史  
將五千人屯樓蘭西當焉耆龜茲徑路南疆鄯善  
于寘心膽北扞匈奴東近敦煌從之置西域副校  
尉居敦煌雖羈縻西域亦未能出屯其後匈奴果  
數與車師入寇延光二年復以勇為西域長史將

兵五百人出屯柳中明年正月勇至樓蘭以鄯善  
歸附特加三綬發其兵到車師前王庭擊走匈奴  
四年復發鄯善疏勒車師前部兵擊後部王軍就  
大破之

三國志魏帝紀黃初三年鄯善王遣使奉獻詔遣  
使慰勞之

晉書張駿傳駿使將楊宣伐鄯善其王元孟獻女  
又苻堅載記太元七年鄯善王伏密馱朝于苻秦

請年年貢獻堅以西域路遙不許令三年一貢九年一朝以為永制

魏書西域傳鄯善國都扞泥城古樓蘭國也去代  
七千六百里所都城方一里北即白龍堆路至太  
延初始遣其弟素延耆入侍及太武平涼州沮渠  
牧犍弟無諱走保敦煌無諱後謀渡流沙遣其弟  
安周擊鄯善王比龍恐懼欲降會魏使者自天竺  
罽賓還俱會鄯善勸比龍拒之遂與連戰安周不

能尅退保東城後比龍懼率衆西奔且末其世子  
乃應安周鄯善人頗剽刼之令不得通太武詔散  
騎常侍成周公萬度歸討之至其境鄯善人衆布  
野度歸勅吏卒不得有所侵掠邊守感之皆望旗  
稽服其王真達面縛出降度歸釋其縛留軍屯守  
與真達詣京都太武大悅厚待之是歲拜交趾公  
韓扶為假節征西將軍領護西戎校尉鄯善王以  
鎮之賦役其人比之郡縣

周書異域傳鄯善古樓蘭國也東去長安五千里  
魏太武時為沮渠安周所攻其王西奔且末大統  
八年其兄鄯米率衆內附

隋書地理志鄯善郡大業五年平吐谷渾置在鄯  
善城即古樓蘭城也有蒲昌海鄯善水統縣二顯  
武濟遠

又吐谷渾傳煬帝即位鐵勒犯塞令擊吐谷渾以  
自効大敗之復令觀王雄許公宇文述掩之吐谷

渾王伏允懼南遁山谷間其故地皆空自西平臨  
羌城以西且末以東祁連以南雪山以北東西四  
千里南北二千里皆為隋有

唐書地理志伊州伊吾郡納職縣貞觀四年以鄯善  
故城置開元六年省十五年復置

羅布淖爾東南沙磧大河潛入青海境

謹按羅布淖爾東南皆沙磧南山中斷河水伏  
流其中東南趨青海沙磧自大流沙綿折而南

羣山交錯潛流仰汎隱見不常唐書所謂莫賀延磧袤二千里河源東北直莫延磧尾五百里磧入吐谷渾界寢狹故號磧尾者也河水潛行處計一千五百里為入青海之孔道并紀其事如左

魏書沮渠無諱傳真君二年拜無諱為征西大將軍酒泉王尋以無諱叛遣鎮南將軍南陽公奚眷討酒泉克之無諱遂謀渡流沙遣其弟安周西擊

鄯善無諱遂渡流沙士卒渴死者大半仍據鄯善  
又西域傳真君二年詔散騎常侍周公萬度歸  
乘傳發涼州兵討鄯善度歸至敦煌留輜重以輕  
騎五千渡流沙至其境其王出降

周書異域傳鄯善西北有流沙數百里

唐書吐蕃傳吐蕃長鼓右驅踰高昌厯車師鈔常  
樂絕莫賀延磧以臨敦煌

又吐谷渾傳貞觀九年李靖等討吐谷渾大破之



伏允謀入磧疲唐兵師進伏允子順舉國降伏  
允引千餘騎遁磧中

欽定四庫全書

卷三十

欽定四庫全書

河源紀畧卷三十一

紀事六

河水重源青海全境

謹按河水重源自阿勒坦噶達素齊老至流入  
貴德堡皆青海境青海在漢為先零燒當諸羌  
地東晉以後屬吐谷渾唐宋皆為吐蕃地元為  
貴德州及吐蕃朶甘思等處屬宣慰司明為西

蕃以其地未入中國故古稱吐蕃河源我

朝青海全部久入版圖大河靈跡瞭如指掌謹敘述

其疆域之廣袤平定之始末並恭錄

御製平定青海告成太學碑文列于重源之首紀河源者

于以考輿地之大備焉

國初有厄魯特顧實汗者自西北侵有其地遣使來修貢  
詔封遵文行義敏慧顧實汗自分其地為左右二境左境  
則東自西寧邊外董郭爾廟西至肅州嘉峪關邊

則東自西寧邊外董郭爾廟西至肅州嘉峪關邊  
外溢來河八百餘里南自西寧邊外波洛沖克克  
河北岸北至涼州邊外西拉塔拉四百餘里東南  
自西寧邊外拉拉山西北至甘州邊外額濟綏四  
百餘里東北自永昌邊外西至嘉峪關邊外布隆  
吉兒河岸二千餘里右境東自西寧邊外董郭爾  
廟西至噶斯池二千五百餘里南自四川松潘衛  
邊外漳臘嶺北至波洛沖克克河南岸一千五百

餘里東南自洮州邊外達爾古嶺西北至嘉峪關  
邊外塞爾騰西爾拉津二千餘里東北自西寧邊  
外克騰庫特爾西南至木魯烏蘇河一千五百餘  
里部落散處其間謂之西海諸台吉為四衛拉特  
部分之地康熙三十六年既平噶爾丹台吉札什  
巴圖爾等咸來朝內附封爵世襲雍正元年札什  
巴圖爾之子羅卜藏丹津誘衆犯邊

世宗憲皇帝命官兵進剿旬日間悉殲除逆黨平定其地

惟不從逆者仍其封爵定制為三年貢分三班九年一周置互市於西寧日月山開拓新邊增設安西鎮於布隆吉闢地千有餘里三年編青海各部落旗分佐領部落四青海厄魯特二十一旗回特三旗土爾古特四旗喀爾喀一旗為旗凡二十有九御製平定青海告成太學碑文

我國家受

天眷命撫臨八極日月所照罔不臣順遐邇乂安兆人蒙

福乃有羅卜藏丹津者其先世顧實汗自國初稽首歸  
命當時使臣建議畀以駐牧之地其居雜番羌密近甘  
涼我

皇考聖祖仁皇帝睿慮深遠每厯於懷既親御六師平定  
朔漠威靈所加青海部落札什巴圖爾等震驚承命

聖祖仁皇帝因沛殊恩封為親王兄弟八人咸賜爵祿羈  
縻包容示以寬大而狼心梟性不可以德義化三十年  
來包藏異志朕紹登寶位優之錫賚榮其封號尚冀



革心輯寧部衆而羅卜藏丹津昏謬狂悖同黨吹拉克  
諾木齊阿爾布坦溫布藏巴札布等實為元惡謂國家  
方宏浩蕩之恩不設嚴密之備誕敢首造逆謀迫脅番  
羌侵犯邊城反狀彰露用不可釋於天誅遂命川陝總  
督太保公年羹堯為撫遠大將軍聲罪致討以雍正元  
年十月師始出塞自冬涉春屢破其衆凡同叛之部落  
戈鋌所指應時摧敗招降數十萬衆又降其貝勒貝子台  
吉等二十餘人朕猶憫其蠢愚若悔禍思愆束手來歸

尚可全宥而怙惡不悛負險抗違乃決剪滅之計以方  
畧密付大將軍年羹堯調度軍謀簡稽將士用四川提  
督岳鍾琪為奮威將軍於仲春初旬禡牙徂征分道深  
入搃其窟穴電掃風驅搜剔巖阻賊徒蒼黃靡潰窮蹙  
失據羅卜藏丹津之母及逆謀渠魁悉就俘執擒獲賊  
衆累萬牲畜軍械不可數計賊首逃遁我師踰險窮追  
獲其輜重人口殆盡羅卜藏丹津孑身易服竄匿荒山  
殘喘待斃自二月八日至二十有二日僅旬有五日軍士

無久役之勞內地無轉輸之費克奏膚功永清西徼三月之朔奏凱旋旅饒鼓喧轟士衆訢喜四月十有二日以唱逆之吹拉克諾木齊等三人獻俘

廟

社受俘之日臣民稱慶伏念

聖祖仁皇帝威靈震於遐方福慶流於奕葉用克張皇六師殄滅狂賊行間將士亦由感激

湛恩厚澤為朕踴躍用命斯役也芟夷凶悖綏靖番羌俾

烽燧永息中外人民胥享安阜實成

先志以懋有不績廷臣上言稽古典禮出征而受成於學  
所以定兵謀也獻馘而釋奠於學所以告凱捷也宜刊  
諸珉石揭於太學用昭示於無極遂為之銘曰天有雷  
霆聖作弧矢輔仁而行威遠寧邇維茲青海種類實繁  
錫之茅土列在藩垣被我寵光位崇祿富負其阻遐禍  
心潛構恭惟

聖祖慮遠智周瞻念荒服綏撫懷柔朔野既清西陲攸震

爵號渚加示之恩信如何兇狡造謀逆天鼓動昏慙寇  
侵於邊惟彼有罪自干天罰桓桓虎貔爰張九伐王師  
卽路冬雪初零日耀組練雷響輦鉦蠢茲不順敢逆戎  
旅奮張螳臂以當齊斧止如山嶽疾如雨風我戰則克  
賊壘其空彼昏終迷魯不悔戾當剪而滅斯焉決計厲  
兵簡將往搗其巢踰厯嶽嶇坦若垌郊賊棄其家我繫  
而獲牛馬谷量器仗山積蹇免失窟何所逋逃枯魚遊  
釜假息煎熬師以順動神明所福旬日凱歸不疾而速

殪彼逆謀懸首藁街獻俘成禮金鼓調諧西域所瞻此  
惟雄特天討既申羣酋惕息櫜戈偃革告成辟雍聲教  
遐暨萬國來同惟我

聖祖親平大漠巍功煥文邁桓軼酌流光悠久視此銘辭  
繼志述事念茲在茲

河源重發阿勒坦噶達素齊老流為阿勒坦郭勒至  
鄂敦他臘扎凌鄂凌兩淖爾境

謹按大河伏流重源濬發古言積石元明以來

曰星宿海至其西有阿勒坦噶達素齊老水流  
為阿勒坦郭勒則千古以來從無有實履其地  
而詳言之者惟我

朝聲教遠通幅員廣大

命使所臨無遠弗屆恭逢

皇上化洽坤輿川瀆効命

特命侍衛阿彌達往窮河源始知星宿海之西三百里  
有噶達素齊老流泉百道皆作金色真黃河之

上源蓋不惟前代論議所未經並亦聞見所未  
及也其阿勒坦郭勒出巴彥哈拉嶺東麓為唐  
劉元鼎所至之紫山鄂敦他臘為星宿海即元  
史之鄂敦淖爾扎凌鄂凌兩淖爾即唐書之柏  
海元史所謂匯二巨澤名鄂楞諾爾者今就其  
所及者附錄其事于左

唐書吐蕃傳長慶元年大理卿劉元鼎為會盟使  
踰湟水由洪濟梁西南行二千里其南三百里三



山中高而四下曰紫山直大羊同國東距長安五千里

又吐谷渾傳貞觀九年擊吐谷渾侯君集任城王道宗行空荒之二千里士廩冰馬秣雪閱月次星宿川達柏海上

庫蘭河哈拉河諸水來會境

按河水自扎凌鄂凌淖爾東流又折而東南合庫蘭河即元史伊拉齊河又南流會哈拉河諸

水即伊遜鄂羅木九渡河處元史稱鄂敷他拉  
在朶甘思西鄙今自庫蘭河至哈拉河境應為  
朶甘思地古吐蕃西羌屬也今紀其事如左

後漢書西羌傳永元十三年迷唐遠踰賜支河首  
依發羌以居

方輿紀要西蕃朶甘衛都指揮使司在河州衛西  
南本西羌種明設朶甘烏斯藏都指揮使在陝西  
境者為朶甘在四川境者為烏斯藏洪武二年遣

使持詔招諭之不從來寇臨洮守將韋正禦却之  
乘冰渡河擣其營懼而請降自是諸部相繼來歸  
六年置朶甘指揮使司及宣慰招討等司萬戶府  
千戶所明年升為都指揮使司復封番僧為闡化  
等王俾導其衆以時朝貢永樂元年番族來朝五  
年遣指揮劉昭等往西番設驛通使正德景泰間  
番族多來朝貢嘉靖元年西番反後督臣王瓊徵  
集大衆招諭諸番諸番復戢隆慶中復修貢如制

既而譖達蠶食西番番人大困萬厯以後西番復定

河水會西拉河諸水至綽通錫伯境

按河水會哈拉河諸水又東流會數水有烏滔河南來注之即朱思本所謂和囉海圖河也又東會西拉河又北經綽通錫伯境即元史帝師薩斯嘉庫濟克特地附紀其事如左

元史釋老傳帝師帕克斯巴者土番薩斯嘉人足

克袞氏也相傳自其祖多爾濟以其法佐國主霸

西海者十餘世中統元年世祖即位尊為國師授

以玉印至元六年升號曰大寶法王更賜玉印十

一年請告西還

帕克斯巴舊作八思巴薩斯嘉舊作薩思迦足克袞舊作族欵多爾

濟舊作朶栗赤今俱譯改

阿木柰瑪勒占木遜山境

按阿木柰瑪勒占木遜山綿亘三百里高峻非

常為青海諸山之冠即禹貢導河之積石亦名

大雪山唐名大積石山元史所謂伊拉瑪博囉  
譯言騰格哩哈達誤名崑崙者河水西來繞其  
南轉而東復繞其北梁寅所謂繞山三面如珎  
者河所環凡千餘里今紀其事如左

後漢書段熲傳延熹三年西羌餘衆復與燒何大  
豪寇張掖頗追之且鬪且行晝夜相攻四十餘日  
遂至河首積石山出塞二千餘里斬燒何大帥首  
虜五千餘人

隋書劉權傳大業五年從征吐谷渾帝令權過曼頭赤水置河源郡積石鎮大開屯田留鎮西境權唐書李靖傳貞觀九年以靖為西海道行軍大總管討吐谷渾踰積石山大戰數十多所殺獲

烏蘭莽察多渾境

按河水繞阿木柰瑪勒占木遜山南會三昆都倫河又東經烏蘭莽察多渾為古析支地漢書西羌傳河關之西南羌地濱於賜支至於河首

綿地千里賜支禹貢所謂析支也水經注司馬  
彪曰河水曲而東北流逕於析支之地是為河  
曲應劭亦謂析支去河關千餘里羌所居謂之  
河曲羌唐書党項古析支自拓拔赤辭內屬於  
是自河首積石山而東皆為中國地烏蘭莽察  
多渾在積石東面河流環曲之境與其地適相  
符合今紀其事如左

後漢書西羌傳自燒當至元孫滇良世居河北大



允谷種小人貧先零卑湍數侵犯之滇良積怒於是集會附落從大榆入掩擊先零卑湍大破之奪居其地大榆中由是始強章和中燒當羌迷唐數入寇永元元年護羌校尉鄧訓遣兵擊之迷唐去大小榆谷徙居頗巖谷四年叅尚代之遣使招迷唐復還居大小榆谷迷唐叛寇金城塞五年貫友代之遣兵出塞攻迷唐於大小榆谷敗走之遂夾逢留大河造河橋以度兵十年迷唐降詔令迷唐

將其種人還大小榆谷迷唐以漢作河橋兵來無  
常故地不可復居不肯出校尉吳祉促使出塞遂  
復叛後迷唐遂弱遠徙西海及大小榆谷左右無  
復羌寇

隋書西域傳党項羌者三苗之後也處山谷間每  
姓別為部落大者五千餘騎小者千餘騎魏周之  
際數來擾邊高祖為丞相時中原多故因此大為  
寇掠蔣公梁虜既平王謙請因邊師以討之高祖

不許開皇四年有千餘家歸化五年拓拔寧叢等各率衆詣旭州內附授大將軍其部下各有差十年寇會州詔發隴西兵以討之大破其衆又相率請降遣子弟入朝自是朝貢不絕

唐書西域傳党項漢西羌別種古析支也東距松州西葉護南春桑迷桑等羌北吐谷渾貞觀三年南會州都督鄭元璠鑄諭其酋細封步賴舉部降以其地為軌州其後諸酋長悉內屬有拓拔赤辭

者初臣吐谷渾慕容伏允後亦內屬於是自河首積石山而東皆為中國地

又吐蕃傳景龍二年金城公主至吐蕃吐蕃即厚餉鄯州都督楊矩請河西九曲為公主湯沐矩表與其地九曲者水甘草良宜畜牧近與唐接自是鹵益張開元二年吐蕃寇臨洮大敗之宰相建言吐蕃本以河為境以公主故乃橋河築城今既負約請毀橋復守河如約詔可天寶十二載隴右節

度使哥舒翰破洪濟大漠門諸城收九曲故地於是置神策軍及宛秀軍以寔河曲

五代史四夷附錄党項西羌之遺種在禹貢析支之地東至松州西接葉護南界春桑北隣吐渾有地三千餘里無城邑

河水自伊克圖爾根山北東北流至北里嶺北境

按河水自烏蘭莽察多渾境北流又西北流又西流又西北流經伊克圖爾根山北折北流始

轉東北仍歸東流曲曲數百里自轉東北流處  
至北里嶺北又三百餘里烏蘭莽察多渾古党  
項地唐書党項北接吐谷渾自此東北當為吐  
谷渾西境北里嶺之北即青海魏書載吐谷渾  
可汗居伏俟城在青海西十五里其境適合今  
紀其事如左

晉書西戎傳吐谷渾慕容廆之庶長兄也永嘉之  
亂始渡隴而西其後子孫據有西零已西甘泉之界

極乎白蘭數千里吐谷渾子吐延吐延子葉延以  
吐谷渾為氏葉延子辟奚聞苻堅之盛遣使獻馬  
金銀堅拜為安遠將軍辟奚子視連通聘於乞伏  
乾歸拜為白蘭王

宋書鮮卑吐谷渾傳景平中吐谷渾阿林遣使上  
表獻方物元嘉三年其弟慕瓚立七年授為隴西  
公九年遣使貢獻進爵隴西王十三年慕延立遣  
使奉表十六年改封河南王十九年拓跋燾遣軍

擊慕延大破之慕延率部落西奔白蘭二十七年  
慕瑣兄樹洛千子拾寅自立秦始皇五年奉使獻方  
物

南齊書河南羌傳建元元年進河南王吐谷渾拾  
寅驃騎大將軍三年子易度侯立以為西秦河二  
州刺史河南王武帝八年子休留茂立授西秦河  
二州刺史

梁書西北戎傳梁興進河南王休留代為征西將



軍子休運籌襲爵天監十三年遣使貢獻十五年  
又遣使獻方物其使或歲再三至或再歲一至普  
通元年子呵羅真立詔為西秦河二州刺史

魏書吐谷渾傳世祖時慕瑱始遣其侍郎謝大寧  
奉表歸國尋討禽赫連定送之京師策拜慕瑱為  
大將軍太延二年弟慕利延立世祖征涼州慕利  
延懼率其部人西遁沙漠遣使宣諭之乃還慕利  
延兄子緯代懼慕利延害已謀欲歸國慕利延殺

之緯代弟叱力延等八人逃歸京師請兵討之慕  
利延走白蘭復討之遂入于闐七年兄子拾寅立  
始邑于伏羅川修奉貢職世祖拜為鎮西大將軍  
西平王後拾寅自恃險遠頗不恭命詔討之復修  
藩職太和五年子易度候立遣其侍郎時真貢方  
物于伏連籌立高祖欲令入朝表稱疾後遣侍子  
賀魯頭來朝拜伏連籌為吐谷渾王終世宗世至  
於正光聲牛蜀馬及西南之珍無歲不至子夸呂

立始自號為可汗其地東西三千里南北千餘里  
兼鄯善且末興和中獻武王徵其朝貢乃遣使人  
趙吐骨真假道蠕蠕頻來此後朝貢不絕

周書異域傳魏廢帝二年太祖勒大兵至姑臧吐  
谷渾王夸呂震懼遣使貢方物是歲夸呂又通使  
於齊氏涼州刺史史寧襲之魏恭帝二年史寧又  
與突厥木汗可汗襲擊夸呂破之武成初夸呂復  
寇涼州詔賀蘭祥宇文貴率兵討之又拔其城保

定中夸呂前後三輩遣使獻方物天和初其龍涸  
王莫昌率衆降二年五月復遣使來獻建德五年  
其國大亂高祖詔皇太子征之夸呂遁走明年又  
再遣奉獻宣政初其趙王他婁屯來降自是朝獻  
遂絕

隋書西域傳吐谷渾開皇初內侵遣上柱國元諧  
率步騎數萬擊之賊悉發國中自曼頭至樹敦甲  
騎不絕前後來拒戰諧頻破之夸呂大懼率親兵

遠遁其名王十三人召率部落而降上以其高寧  
王移茲哀素得衆心拜大將軍封河南王以統降  
衆八年河南王移茲哀死文帝詔令其弟樹歸襲  
統其衆平陳之後夸呂大懼逃遁險遠不敢為寇  
十一年夸呂卒子世伏使其兄子無素奉表稱藩  
并獻方物十七年其國大亂國人殺世伏立其弟  
伏允為主煬帝即位伏允遣子順來朝時鐵勒犯  
塞帝遣將軍馮孝慈出敦煌禦之戰不利鐵勒遣

使謝罪請降帝遣黃門侍郎裴矩慰撫之諷令擊吐谷渾以自效鐵勒即勒兵襲破吐谷渾伏允東走保西平境帝復令觀德王雄出澆河許公宇文述出西平掩之大破其衆伏允遁逃於山谷間其故地皆空自西平臨羌城以西且末以東祁連以南雪山以北東西四千里南北二千里皆為隋有置郡縣鎮戍伏允無以自資率其徒數千騎客于党項帝立順為主送出玉門令統餘衆不果入而

還大業末天下亂伏允復其故地屢寇河右郡縣  
不能制

唐書西域傳吐谷渾居甘松山之陽洮水之西南  
抵白蘭地數千里隋亂得復其故地高祖受命順  
自江都還長安于時李軌據涼州帝乃約伏允和  
令擊軌自効當護送順伏允喜引兵與軌戰庫門  
交綏止即遣使請順帝遣之順至號為太寧王太  
宗時伏允遣使者入朝未還即寇鄯州又掠岷州

都督李道彥擊走之俄寇涼州又其相天柱王拘  
天子行人貞觀九年詔李靖為西海道行軍大總  
管統諸軍擊之子順舉國降伏允引千餘騎遁死  
國人立順為君稱臣內附詔封西平郡王號趙胡  
呂烏甘足可汗帝怒未能定其國遣李大亮率精  
兵鎮授順卒為下所殺立其子燕王諾曷鐸詔封  
諾曷鐸河源王王號烏地也拔勒豈可汗既而與  
吐蕃相攻吐蕃出兵擣虛破其衆黃河上諾曷諾



不支引數千帳走涼州吐蕃遂有其地諾曷鉢請  
內徙乾封初更封青海國王至慕容復後倖襲吐  
谷渾自晉永嘉時有國至龍朔三年吐蕃取其地  
凡三百五十年及此封嗣絕矣

庫庫淖爾

按庫庫淖爾即古青海一名西海一名卑禾羌  
海一名僂海一名鮮水元史名呼呼腦兒一統  
志載青海在西寧府西五百餘里其水周迴七

百五十餘里水色青綠中有山名奎邈托羅海  
察罕哈達東西對峙即古所稱龍駒島應龍城  
故址也河水東流淖爾在其北衆山圍繞與大  
河相望支流交錯為河流環帶中衆川旁蓄之  
區並紀其事如左

雍正二年大兵征青海岳鍾琪追賊黨阿喇蒲坦  
溫布等至西海北岸伊克哈爾吉河時人馬渴甚  
求水不得忽有泉從營前湧出成溪士馬就飲得

不困乏衆歡呼奮勇遂進獲賊首督臣以青海效  
靈奏聞

詔封青海之神立碑致祭

漢書趙充國傳神爵元年西羌背畔酒泉太守辛  
武賢請分兵並出張掖酒泉合擊罕开在鮮水上  
者又充國上屯田奏曰治隍陁以西道橋七十所  
令可至鮮水左右

又王莽傳元始四年遣中郎將平憲等誘塞外羌

使獻地憲等奏言羌良願等願為內臣獻鮮水海  
允谷鹽池平地美草皆予漢民

後漢書西羌傳武帝元鼎四年先零羌與匈奴通  
合兵十餘萬攻令居安故遂圍枹罕遣將軍李息  
郎中徐自為將兵十萬人擊平之始置護羌校尉  
等擊叛羌西海及大小榆谷左右無復羌寇隃麋  
相曹鳳上言自建武以來諸羌犯法者常從燒當  
種起所以然者以其大小榆谷土地肥美又近塞

內北阻大河因以為固又有西海魚鹽之利故疆  
大常雄諸種宜及此時建復西海郡縣度設屯田  
國家可以無西方之憂於是拜鳳為金城西部都  
尉

資治通鑑晉安帝隆安二年楊軌收集餘衆至萬  
餘降于西平王禿髮烏孤尋為羌苻梁饑所敗西  
犇僂海襲乞弗鮮卑而據其地

又義熙九年河西王沮渠蒙遜遣冠軍將軍伏恩

將騎一萬襲卑和

即卑和

烏啼二部大破之十三年

蒙遜復遣其將擊卑和部降之

周書史寧傳與突厥木汗分道襲吐谷渾還軍青海  
與木汗會

隋書帝紀大業五年置馬牧於青海以求龍種無  
效而止

唐書吐谷渾傳吐谷渾寇涼州鄯州刺史李元運  
表吐谷渾牧馬青海輕兵掩之可盡致乃命左驍

衛大將軍段志元等擊之羌知之驅牧馬走

又吐蕃傳儀鳳三年李敬元率劉審禮擊吐蕃青海上敗績開元十四年吐蕃悉諾還兵入大斗拔谷遂攻甘州焚掠而歸王君奭率軍窮躡出青海西方冰合師乘而渡時寇已踰北大山留輜重疲弱濱海君奭縱兵俘以旋明年鄯州都督張志亮又戰青海西破之二十五年河西節度使崔希逸發兵襲吐蕃青海上天寶元年隴右節度使皇甫

惟明破大嶺軍戰青海破莽布支斬首三萬級  
又黑齒常之傳永隆二年贊婆營青海常之馳掩  
其屯破之

又哥舒翰傳天寶七載翰築神威軍青海上吐蕃  
攻破之更築龍駒島又號應龍城謫罪人二千戍  
之由是吐蕃不敢近青海

明史西番傳洪武十六年青海酋七人來歸賜文  
綺寶鈔青海水草豐美番人環居之專務畜牧日



益繁滋素號樂土正德四年蒙古部酋瞰知青海  
饒富襲而據之大肆焚掠番人失其地多遠徙其  
留者不能自存反為所役屬自是甘肅西寧始有  
海寇之患九年總制彭澤搗其巢寇遁去及大軍  
引還仍還海上嘉靖十一年河套酋引衆西掠收  
其部落大半而去後北部俺答又羨青海富饒三  
十八年攜數萬衆襲據其地已引去留其子據青  
海西寧被其害萬厯中番族屢寇邊十九年總兵

官戚繼光破走之尚書鄭洛進兵青海逐其餘衆而還已復聚於青海雖屢入鈔掠然為患不甚劇河水流入貴德堡境

按貴德堡隋為澆河郡地唐宋為積石軍地金為積石州西界元為貴德州隸吐蕃等處宣慰司明置守禦千戶所今其地在河州西八百二十里距京師五千四十里大河自初折東北流之處行七十里又東經貴德所西甘肅通志歸德

所北至黃河一里西北至黃河籠羊硤果密番  
族界七十里是也自此東流七百里入甘肅河  
州界為中國黃河謹紀其事如左

雍正元年十一月大兵征青海羅卜藏丹津率眾  
數千攻入南川口叅將宋可進等擊敗之十二月  
將軍年羹堯以南川口外郭密九部肆行剽掠招  
下其沙克都爾阿喇卜坦等三部餘部仍肆掠如  
故呈庫和爾嘉二部暴橫尤甚令叅贊岳鍾琪率

瓦斯襟谷兵先赴歸德堡于上寺東策卜下寺東  
策卜剿撫諸番即移師進剿郭密賊衆搜其巢穴  
呈庫一部攻殺畧盡餘部悉加安撫岳鍾琪令副  
將張玉率綠旗土司兵至歸德堡雙蓬攢都津盖  
博拉諸番頭目各以其屬來降并進勦拉扁二寨  
撫其餘衆而還二年三月青海平議於歸德堡增  
設把總一統兵二百

詔從之

唐書地理志逢化縣西有積石軍本靜邊鎮

資治通鑑積石軍每歲麥熟吐蕃輒來獲之無能禦者邊人謂之吐蕃麥莊哥舒翰為隴右節度副使先伏兵於其側寇至斷其後夾擊之無一人得返者自是不敢復來

唐書吐蕃傳開元二十六年隴右節度使杜希望發鄯州兵奪吐蕃河橋築鹽泉城號鎮西軍破吐蕃兵三萬

又天寶二載隴右節度使皇甫維明破洪濟城  
又地理志鄜州西南百四十里為洪濟橋其相近  
有金天軍天寶十三載所置又有漁海遊奕等軍  
在洪濟橋東亦吐蕃所置

宋史地理志積石軍本溪哥城元符間為吐蕃溪  
巴溫所據大觀二年臧征撲哥以城降即其地建  
軍東至鄜州界八十里西至青海一百餘里北至  
西寧州八十里

元史河源附錄篤寔往求河源還至貴德州地名

必齊勒始有州治官府

必齊勒舊作必赤里今譯改

明史西蕃諸衛傳洪武八年山後歸德等州西蕃諸部落皆以馬來市二十五年命中官而聶至河州石必勒諸蕃族以敕諭之爭出馬以獻正統七年河州都指揮劉永奏往歲阿爾官等六族三千

餘人列營歸德城下聲言交易後鈔掠屯軍大肆

焚戮詔指揮張瑀等往諭之番人輸服

必勒舊作必里今譯改





欽定四庫全書

史部  
河源紀畧卷三十二

詳校官監察御史臣王爾烈

刑部郎中臣許兆椿覆勘

纂修官工部主事臣王念孫

謄錄監生臣趙錫寶

欽定四庫全書

河源紀畧

雜錄

臣等謹按禹貢紀土田貢篚自埴壤壚墳以至繇  
喬皮卉璆鐵琳琅之屬靡不備載職方氏叙九州  
山川藪浸利民畜穀所列方物尤詳故列史志地  
理者國邑都會之外必旁及於土風物產遺文故  
蹟志乘家採摛該博其有瑣聞碎事不入專門則

縱為雜錄以總萃之良以資考境辨得失細大不遺斯足尚也大河正源潛發於蔥嶺和闐匯南北兩山及東境諸水伏羅布淖爾重發阿勒坦噶達素齊老之上流為阿勒坦郭勒綿地曠邈事蹟夥繁前代未列版圖徵引之家易滋舛錯恭逢

聖朝德威廣被西域底平寸土尺壤悉歸疆理於是亘古以來伯翳所紀博望所窮漢唐之世經營羈置弗能盡有者皆可恭奉

皇朝輿圖以明指其土地水泉燥濕寒暑之故並其舊  
聞遺蹟之所在與大河靈源宛轉映發而沕昧之  
宇莫不耀於光明茲謹旁採列史百家蔥嶺以下  
貴德以上諸境軼事分條搜輯匯為四卷諸子裨  
官所言徃徃失實隨時加按亦足以訂正其是非  
焉昔人每病西陲土物荒遠難稽良由局於輿地  
囿於見聞耳韋得遊

聖世而彙前聞鈎稽考索言皆有物事必合方濛記之

區初不異禹甸周疆之星陳而日麗也猗歟盛已

欽定四庫全書

河源紀畧卷三十二

雜錄一

葱嶺河源喀什噶爾葉爾羌境

漢書莎車有鐵山出青玉

又西夜國北與莎車接隨畜逐水草往來土出玉石

又難兜有銀銅鐵

後漢書西夜生白草

又耿恭于城

疏勒城

中穿井十五丈不得水吏士渴

乏恭仰嘆曰聞昔貳師將軍拔佩刀刺山飛泉湧  
出今漢德神明豈有窮哉乃向井再拜為吏士禱  
有頃水泉奔出

按漢書疏勒為今喀什噶爾莎車為今葉爾羌  
至西夜蒲犁皮山無雷依耐難兜則與二國附  
近在葱嶺山中皆有河源綿亘故以次類附焉  
其烏托屬賓烏弋山離諸國皆在葱嶺西不備

錄後漢書所載耿恭拜井事亦見於水經注據錄於此足為喀什噶爾故實之始云

晉法顯佛國記竭叉國當蔥嶺中自蔥嶺已前草木果實皆異惟竹及安石榴甘蔗三物與漢地同耳從此西行向北天竺在道一月得度蔥嶺蔥嶺冬夏有雪

水經注廣志曰休循國居蔥嶺其山多大蔥

魏書西域傳鉢和國在渴盤陀西其土尤寒有大



雪山望若銀峯

又朱居國在于闐西其人山居

又渴盤陀國在葱嶺東朱駒波西河經其東北有

高山夏積霜雪

又波知國在鉢和西南土狹人貧依託山谷

北史西域傳鉢和國服羶裘

又疏勒王戴金獅子冠

又疏勒多銅鐵錫雄黃土多稻粟菽麥

又疏勒國遣使送釋迦牟尼佛袈裟一長二丈餘  
帝以審是佛衣應有靈異遂燒之以驗虛實置於  
猛火之上經日不然人手足皆六指產子非六指  
者皆不育

按北史所傳佛衣長二丈餘經火不燃其說疑  
出附會產子六指尤非恒理疏勒為今喀什噶  
爾未聞其地奉佛亦並無六指之異以今証古  
知北史之未為實錄也

又朱居國有麥多林果

又賒彌國不信佛法專事諸神

唐辨機西域記蔥嶺者據贍部洲中崖嶺數百重  
幽谷險峻恒積冰雪寒風勁烈地多出蔥故謂蔥  
嶺又以山崖蔥翠遂以名焉

又波謎羅川中有大龍池東西三百餘里南北五  
十餘里據大蔥嶺內當贍部洲中其地最高水乃  
澄清皎鏡莫測其深色帶青黑味甚甘美潛居則

蛟螭魚龍鼉鼉龜鼈浮游乃駕鵞鴻雁鴛鴦鵝鵠  
諸鳥大卵遺殼荒野或草澤間或沙渚上池西派  
一大流西至達摩悉鐵帝國東界與縛芻河合而  
西流故此以右水皆西流池東派一大流與徒多  
河合而東流波謎羅川南越有鉢露羅國多金銀  
金色如火

又跋祿迦國土宜氣序人性風俗文字法則同屈  
支國語言少異細氈細毘鄰國所重

又素葉水城城周六七里諸國商賈雜居焉土宜  
麻麥蒲萄林樹稀疏氣序風寒人衣氍毹素葉已  
西數十里城皆立長

又佛力恃薩儻那國東北踰山涉川越迦畢試國  
邊城小邑凡數十所至大雪山婆羅犀那大嶺嶺  
極崇峻危陞敔傾蹊徑槃迂巖岫回互或入深谷  
或上高崖盛夏含凍鑿氷而度行經三日方至嶺  
上寒風淒烈積雪彌谷行旅經涉莫能佇足飛隼

翱翔不能越度足趾步履然後翻飛下望諸山若  
觀培塿瞻部洲中斯嶺特高其嶺無樹惟多石峯  
攢立叢倚森然若林

按西域記所載諸山川皆唐僧元奘得諸親歷  
嬰羅犀那大嶺實蔥嶺極西處也形勢險峻足  
資考証備載其說以見蔥嶺之高大焉

又烏鐵國周千餘里國大都城周十餘里南臨從  
多河地土沃壤稼穡殷盛林木鬱茂華果俱繁多

出雜玉白玉黠玉

又佉沙國多沙磧少壤土稼穡殷盛華果繁茂出  
細氈毼

又斫句迦國周千餘里國大都城周十餘里堅峻  
險固編戶殷盛山阜連屬磔石彌漫臨帶兩山頗  
以耕植蒲萄梨柰其果實繁

唐書西域傳蔥嶺俗名極疑山環竭盤陀國

又由疏勒西南入劍末谷不忍嶺六百里西北判

汙國治蔥嶺中都城負徒多河其本王疏勒人世  
相承為之西南即頭痛山

按徒多河即今大河之別名西域記作徒多唐  
書則作徒多蓋字畫傳寫之誤今考西域記注  
有云舊作私陀河私徒音相近當以西域記為  
正

又護密者元魏所謂鉢和橫一千六百里縱狹纔  
四五里北臨烏訥河地寒沍堆阜曲折沙石流漫



又疏勒俗事祆神

宋馬端臨文獻通考渴盤佗朱俱波語言與于闐相似其間多有異者

又疏勒國樂有豎箜篌琵琶五絃橫笛簫箏篳篥  
臘鼓腰鼓提鼓鷄鼓十種為一部二十二人隋唐  
以備燕樂工人皂絲布白頭巾袍錦褙白絲布褲  
舞人白襖綿袖赤皮鞞赤皮帶曲調有昔昔鹽一  
臺鹽之類

欽定西域圖志云回人尊敬天神每城設禮拜寺始生  
教主曰派噶木巴爾每日對之誦經五次初次寅  
時二次未時三次申時四次酉時五次戌時拜畢  
則宣讚其義每七日赴禮拜寺誦經一次務集四  
人合誦不論貴賤貧富皆然回人誦經典者曰阿  
渾誦經以禳災迎福每遇大小年阿渾誦阿伊特  
瑪納斯經為衆祈佑衆人醵贈衣帽一襲遇青草  
當生時有牲牧之家每十羊出一牽三十牛出一

頭送阿渾為敬天禮阿渾牲畜蕃滋有贏餘牛羊  
即以之濟貧乏不自私也派噶木巴爾立祠堂奉  
香火名曰瑪咱爾每年兩次衆人赴瑪咱爾禮拜  
誦經張燈於樹通宵不寐瑪咱爾有香火田畝以  
供祭祀之需回部西有默克默德納為回之祖國  
回人凡終身必親往禮拜以答鴻庥辦裝糧往還  
期以三年惟富者能酬願貧無力者不能也亦有  
附香火之資於富室以偕往者又山南諸回部有

城郭宮室故居處有恒有溝塍隴畝故田作有時  
男識耕耘女知紡績漢書言自且末以東皆種五  
穀是也耕織之外多善商賈自西土以及傍近諸  
國無不至回俗以豕性昏形穢忌不食喜從高放  
鵬鵠其人謂之鵬師赤云

又回俗以教主初生之年為元年閏一歲則加一  
年刻年數於汗之印上以為歲每三百六十日為  
一年不增減故每四年而餘二十一日四十年而

餘七月四百八十年而餘七年矣滿三百六十日  
為一年謂之大年大年第一日如中國之元旦伯  
克戎裝齋教主所賜纛鼓樂擁護率其衆赴禮拜  
寺行禮衆回人咸隨以行禮畢交相叩賀不殺生  
先期三十日必把齋日出閉齋星見開齋不茹葷  
惟產婦不把齋兒大則補之大年前十五日懸葫  
蘆於樹盛油其中油盡燈落遂踏破之以是為破  
除一切災咎云元旦後七十日為小年殺羊以祭

天伯克行禮相慶如大年例

又回人稱錢為雅爾瑪克以一錢為一普爾普爾  
為言文也每一普爾直銀一分初以五十普爾為  
一騰格直銀一兩回語謂一曰必爾二曰伊奇三  
曰玉聚四曰托爾托五曰別實六曰阿勒題七曰  
葉題八曰薩奇資九曰托科資十曰溫百曰玉資  
千曰明萬曰圓瑞回語謂溫曰圓瑞蓋十萬騰格  
也

又回部食器銅鐵為質者居多即王延德所稱治金銅鐵為器四者近是也至彼中珍玩或以良金粹玉為質尋常歐冶琢磨之匠罕能為之如銅噉噉剪器回玉圭皆其先世珍異考噉噉剪畧近盤匱用貯漿齊亦當時飲食之器圭璋之制於回部無聞或中國流傳及彼倣而為之其形偶相合耳回俗舊尊經典凡諸旗幟悉書梵語以祈靈庇茲噉噉剪及玉圭並勒旁行回字為祝嘏詞與唐時

回銅器相同皆中國勒銘鼎彝之意云

又回書有名陀犁克者如內地之史字書名阿里  
卜回經名庫魯安醫書名惕普奇塔普農書名哩  
薩拉占候之書名魯斯納默餘書凡數百種其流  
傳內地者絕少

按回部為西域天山南路之統名其地風氣習  
俗大畧相同恭讀

欽定西域圖志總叙諸部風俗仰見



聖世優游化導因其教不易其宜之至意茲敬錄各條  
以不分諸部總叙於第一卷中

又回部土地肥瘠不一五穀之種稻米為少名固  
倫特餘如黍名塔哩克稷名克資勒庫納克高粱  
名圖布喇巴什庫納克麥名布赫岱青稞名阿爾  
帕豆有豌豆名阿克普爾察克扁豆名羅布雅小  
豆名納呼圖萊豆名瑪實麻名琨珠特有黑白黃  
三種瓜名喀萊西瓜名塔爾布斯大者重四五十

斤甜瓜名塔特里克喀袞小而脆茄名帕廷干瓠  
名阿實喀巴爾紅蘿蔔名則爾達克白蘿蔔名察  
木古爾菜名格咱克野蔥名闊雅資黃芽韭名庫  
爾德秦椒名塔里瑪穆爾魯楚胡椒名木爾楚薑  
名贊濟必勒樹之有果者石榴名阿納爾蘋果名  
阿勒瑪木瓜名必喜梨名那什巴第櫻桃名哲納  
斯台杏名額魯克柿名阿拉瓦菓濟特核桃名揚  
阿克李子名愛納魯葡萄長者名薩伊心圓者名

裕祖木別有綠色者味倍甘無核截條栽地而生  
布哈爾部種也名奇石蜜食桃名蜜陽薩沙布托  
里棗名奇蘭其桑椹實大而味厚名裕珠瑪可佐  
糧儲無子者名沙圖特無果之樹則榆名喀喇雅  
阿特槐名圖呼瑪克柳名喀拉薩幹特大葉楊名  
喀喇特呼克有小葉楊枝附幹直上不旁出最堅  
勒名之曰蘇幹已達爾塔喇克松名喀楚喇柏名  
喀爾該桐名圖呼喇克花草之形似內地者如玫

瑰名古里蘓嚕克吉祥草名訥爾格斯鷄冠名搭  
吉和喇斯蜀葵名拉列古勒千日紅名古里雅蘓  
曼鳳仙名赫納向日葵名阿卜塔卜帕喇斯狗尾  
花名喀摩楚古勒有草沿地蔓為藤花紅白子細  
而扁可煮食亦可飼馬其名曰葉斯穆克有草實  
如繭中絲如細纊名為頗斯國人取織以為布

又回部之鳥鵬名布爾克特海青名喀爾察海克  
鵲名伊特勒古鷹名鵲斯寒鴉名塔哈納克雁名

噶斯多鶴而少鶴鶴名哈爾噶鶴名琿水鷄鵠亦  
巢於木名克克庫克鷄鵠名沙圖提雉名克爾果  
爾班鳩之羽五色陸離名帕哈達克鵲之大者幾  
如雁名薩克則干燕名哈爾魯阿特雀名爾阿克  
庫微喀微俱巢於室及濱水之岸他如畫眉名布  
勒百靈名托爾海倒掛名伊資哈克鷄鵠名伯德  
納鵠名喀布特爾鷄名圖赫依皆木棲鴨名鄂爾  
德克鵠名阿克阿斯水禽則交鵠名阿克烏喀爾

鷺名烏喀爾水鴉名喀爾噶其獸則熊名愛伊克  
虎名約勒巴爾斯豹名伊勒必斯犛牛名喀拉犀  
名葉爾沙赫馬名阿特羸名喀齊爾驢名額伊沙  
克駱駝名圖噶盤羊名固勒札山羊牡名特克牝  
名阿楚庫黃羊名括楞獐羊名爾喀克鹿名布輝  
牝鹿名瑪喇勒犖名伊勒巴遜狼名貝哩狐名圖  
勒齊狸名摩倫豕名通烏斯貓名穆舒克狗名伊  
特兔名托什千鼠名薩特堪灰鼠名題音銀鼠名

阿爾斯貂鼠名布勒罕娑羅鼠名蕪勒遜獺名喀  
瑪蛇名伊蘭有無鱗魚口甚圓身微扁大者七八  
尺小者六七尺其名魯赫伊龜名克里雅爾有文  
哈名怕哈察納格蝦蟆名帕喀蠶名闢里雅庫爾  
圖牛馬驢羊諸畜生扎達大可如拳色或黃或白  
或如鸚哥嘴者為最貴其堅如石在蛇腹者尤良  
牲畜有扎達則漸羸瘦久則死以生剖得者為靈  
彼俗祈雨以扎達石浸水中咒之輒有驗其人遂

名為扎達齊

又回部所產五金有黃金名勒屯白金名庫穆什  
紅銅名蜜斯黃銅名圖特而無青銅有鉛名庫爾  
阿遜鐵名圖摩爾錫多產名喀里葉又有水銀名  
斯瑪卜硃砂名察爾克庫蜜硫黃名古古爾圖硝  
名碩喇硃砂硫黃產天山中天山為準部南屏回  
部北屏故準回兩部皆有之玉名喀什產和闐南  
山者為最良河出山中為玉河有紺黃青碧元白



數色小者如拳大者如枕因名其河為哈什庫勒  
土爾番北山高崖下白石成堆似玉若人骨紋縷  
明析顏色光潤質輕而不可握相傳為羅漢靈骨  
以近似名之而實非也鹽名圖斯白者如玉赤者  
如朱堅者似石亦有金剛鑽名阿勒瑪斯百鍊不  
消可以切玉

按回部物產詳見列代史書今既採輯附見各  
門

聖代疆理亭育碩大豐繁西域土物之盛前史所未及  
見者今並從圖志中抄錄類叙資考覽焉

